

**NAPOMENA: RADNA VERZIJA-finalna**  
**(sugestije i prijedlozi Radne grupe**  
**od dana 07.05.2018.godine)**

**P R A V I L N I K**

**o načinu organizovanja i provođenja takmičenja i smotri učenika osnovnih  
i srednjih škola na području Kantona Sarajevo**

**Član 1.**  
**(Predmet)**

Pravilnikom o načinu organizovanja i provođenja takmičenja i smotri učenika osnovnih i srednjih škola na području Kantona Sarajevo (u daljem tekstu: Pravilnik) uređuju se: nivoi i organizacija takmičenja i smotri djece predškolskog uzrasta i učenika osnovnih i srednjih škola, te vrednovanje postignutih rezultata učenika, nagrađivanje, finansiranje, praćenje i izvještavanje.

**Član 2.**  
**(Definicija pojmova)**

Posebni izrazi u ovom pravilniku imaju slijedeća značenja:

- a) **Smotra** je pojedinačno i ekipno predstavljanje postignuća u vještinama i sposobnostima djece i učenika-pojedinaca iz kulturno-umjetničkog i tehničkog stvaralaštva.
- b) **Takmičenje** je organizovana aktivnost u kojoj se iskazuju stečena znanja, vještine, sposobnosti, sklonost i interesovanje učenika-pojedinaca za pojedine predmete koji se izučavaju u školi, a izvodi se pojedinačno ili ekipno, na osnovu propozicija, iz nastavnih predmeta, odnosno oblasti.
- c) **Cilj takmičenja i smotri** je afirmacija odgojno-obrazovnog rada kroz predstavljanje dostignutog nivoa znanja, vještina i sposobnosti, te razvoja potencijala učenika u skladu sa njihovim afinitetima i interesovanjima.
- d) **Zadaci takmičenja i smotri** su provjera rezultata rada, stečenih znanja, vještina i sposobnosti učenika iz nastavnih predmeta, odnosno oblasti.
- e) **Vrednovanje** je procjena postignutog nivoa znanja, vještine i sposobnosti učenika na takmičenju i smotri, iskazana brojčanom vrijednošću, na osnovu koje se vrši rangiranje učenika.
- f) **Propozicije takmičenja i smotri** preciznije propisuju skup uslova za pripremu i održavanje pojedinačnog-ekipnog takmičenja i smotre, a donose se za takmičenje i smotru iz svakog predmeta ili oblasti.
- g) **Kalendar takmičenja i smotri** definiše plan i vremenski okvir za realizaciju takmičenja i smotri učenika za svaku školsku godinu.

**Član 3.**  
**(Smotre/takmičenja i nivoi)**

- (1) Smotra iz člana 2. tačka a) ovog pravilnika organizuje se na:
  - a) predškolskom nivou,
  - b) osnovnoškolskom nivou i
  - c) srednjoškolskom nivou.
- (2) Smotra može biti:
  - a) revijalnog karaktera i
  - b) revijalno-takmičarskog karaktera.
- (3) Takmičenje iz člana 2. tačka b) ovog pravilnika organizuje se na:
  - a) školskom,
  - b) općinskom,
  - c) kantonalnom,

- d) federalnom,
  - e) državnom,
  - f) regionalnom i
  - h) međunarodnom nivou.
- (4) Takmičenja na nivou Kantona Sarajevo se mogu organizovati za učenike iz nastavnih predmeta, odnosno oblasti:
- a) iz kojih su organizovana takmičenja na nivou općina,
  - b) iz kojih nisu organizovana takmičenja na nivou općina.

#### **Član 4.**

##### **(Organizacija i realizacija takmičenja i smotri)**

- (1) Predškolska ustanova, škola, općina, Prosvjetno-pedagoški zavod (u daljem tekstu: Pedagoški zavod), Ministarstvo za obrazovanje, nauku i mlade KS (u daljem tekstu: Ministarstvo) ili strukovno udruženje kao organizator i/ili realizator takmičenja ili smotre obavezan je obezbijediti neophodne uslove za realizaciju istih.
- (2) Strukovno udruženje može organizovati takmičenje uz saglasnost Ministarstva.
- (3) Školska takmičenja i smotre iz nastavnih predmeta, odnosno oblasti organizuju škole s ciljem odabira najuspješnijih učenika, koji će predstavljati školu na općinskom i/ili kantonalnom takmičenju.
- (4) Općinska takmičenja i smotre iz nastavnih predmeta, odnosno oblasti organizuju općinske službe nadležne za poslove obrazovanja s ciljem odabira najuspješnijih učenika koji će predstavljati općinu na takmičenjima i smotrama na višem nivou, a realizuju se najkasnije 7 dana prije kantonalnih, odnosno sljedećih takmičenja.
- (5) Kantonalna takmičenja i smotre iz nastavnih predmeta, odnosno oblasti organizuje Pedagoški zavod, kao i drugi organizatori uz saglasnost Ministarstva, s ciljem odabira najuspješnijih učenika koji će predstavljati Kanton na takmičenjima i smotrama na višem nivou, a realizuju se najkasnije 7 dana prije takmičenja i smotri na višem nivou.
- (6) Federalna, državna, regionalna i međunarodna takmičenja organizuju nadležna ministarstva, institucije, ustanove ili strukovna udruženja koje se bave obrazovanjem.
- (7) Nadzor nad kantonalnim takmičenjima koje organizuju strukovna udruženja vrši Pedagoški zavod.

#### **Član 5.**

##### **(Učesnici takmičenja i smotri)**

- (1) Smotre djece predškolskog uzrasta revijalnog su karaktera i organizuju se na nivou predškolskih ustanova, općinskom i kantonalnom nivou.
- (2) Učesnici kantonalnih takmičenja i smotri su učenici koji pohađaju osnovne i srednje škole na području Kantona Sarajevo.
- (3) Pravo učešća na takmičenjima i smotrama iz člana 3. stav (4), tačka a) imaju učenici koji su učestvovali na takmičenjima i smotrama na nivou općina i koji su ostvarili rezultate, odnosno osigurali pravo za takmičenje na višem nivou, propisane propozicijama organizatora takmičenja i smotri.
- (4) Pravo učešća na takmičenjima i smotrama iz člana 3. stava (4), tačka b) imaju učenici koji su na školskim takmičenjima i smotrama ostvarili rezultate, odnosno osigurali pravo za takmičenje na višem nivou, propisane propozicijama organizatora takmičenja i smotri.

#### **Član 6.**

##### **(Program/Projekat takmičenja i smotri)**

- (1) Radi dobivanja saglasnosti za organizaciju i realizaciju kantonalnog takmičenja i/ili smotre organizator je obavezan dostaviti Ministarstvu Program/Projekat najkasnije do 30 oktobra tekuće školske godine.
- (2) Program/Projekat za svako pojedinačno takmičenje i smotru sadrži način organizacije, pripremu i realizaciju, metodološka uputstva, ciljeve i zadatke, kao i finansijski plan za provođenje takmičenja i smotri.

- (3) Saglasnost za organizaciju i realizaciju takmičenja i/ili smotre iz nastavnih predmeta, odnosno oblasti daje ministar.

### **Član 7.**

#### **(Sadržaj propozicija)**

- (1) Sadržaj takmičenja i/ili smotre je primjeren uzrastu učenika.
- (2) Propozicije takmičenja i/ili smotre iz svakog nastavnog predmeta, odnosno oblasti utvrđuje Ministarstvo u saradnji sa organizatorom i obavezno sadrže:
  - a) organizacione i tehničke uslove, te vremenski okvir trajanja takmičenja ili smotre,
  - b) uslove za učešće učenika na takmičenju i/ili smotri,
  - c) način provjere znanja, vještina i sposobnosti, odnosno način predstavljanja učenika,
  - d) način vrednovanja rezultata i rangiranja učenika,
  - e) pravo i rok za podnošenje prigovora učesnika na takmičenje ili smotru,
  - f) način odabira učesnika koji će se takmičiti na višem nivou,
  - g) nagrade, priznanja i pohvale učenicima, nastavnicima i školama.
- (3) Propozicije takmičenja predstavljaju javni dokument i organizator je obavezan najkasnije 7 dana prije početka takmičenja upoznati učesnike na javan i transparentan način sa istim.

### **Član 8.**

#### **(Kalendar takmičenja)**

- (1) Sa ciljem harmonizacije nivoa takmičenja i/ili smotre, Pedagoški zavod organizuje sastanak sa općinskim službama nadležnim za obrazovanje i organizatorima takmičenja, nakon čega donose prijedlog kalendara takmičenja.
- (2) Kalendar takmičenja i/ili smotre donosi ministar Ministarstva najkasnije do kraja novembra tekuće školske godine i isti dostavlja svim organizatorima, općinskim službama nadležnim za obrazovanje i odgojno-obrazovnim ustanovama.

### **Član 9.**

#### **(Vrednovanje i rangiranje)**

- (1) Vrednovanje rezultata i rangiranje učesnika takmičenja i smotre obavlja takmičarska komisija, koju imenuje organizator, vodeći računa o stručnosti i eventualnim smetnjama za imenovanje u komisiju.
- (2) Takmičarsku komisiju sačinjavaju najmanje tri člana, koja su stručno osposobljena za pregled i ocjenu takmičarskih radova.
- (3) Za Kantonalna takmičenja i/ili smotre, kojima nije organizator Pedagoški zavod ili Ministarstvo, Pedagoški zavod imenuje predstavnika za praćenje takmičenja i/ili smotre.
- (4) Preliminarni rezultati takmičenja i/ili smotre su javni i saopštavaju se istog dana na oglasnoj tabli mjesta takmičenja.
- (5) Učesnik takmičenja i/ili smotre ima pravo uvida u svoj rad nakon saopštavanja preliminarnih rezultata i može uložiti prigovor na vrednovanje rezultata takmičarskoj komisiji.
- (6) Konačna rang-lista sačinjava se poslije razmatranja prigovora i objavljuje se na oglasnoj tabli mjesta takmičenja/smotri.
- (7) Pisani prigovor na konačnu rang-listu, podnosi se najkasnije 24 sata nakon objave (ne računajući dane vikenda i praznike) na protokol Pedagoškog zavoda.
- (8) Pedagoški zavod je dužan najkasnije u roku od 2 radna dana, po prijemu prigovora, razmotriti navode i o odluci izvjestiti podnosioca prigovora i organizatora takmičenja/smotre.

### **Član 10.**

#### **(Priznanja i nagrade)**

- (1) Organizator takmičenja i/ili smotre propozicijama definiše koji učesnici stiču pravo učešća na višem nivou.
- (2) Nagradu najuspješnijim takmičarima organizator obezbjeđuje u skladu sa mogućnostima.
- (3) Direktor škole, u skladu sa kolektivnim ugovorom i drugim aktima, nagrađuje nastavnika i učenika za postignute rezultate na takmičenju i/ili smotri.
- (4) Diplome, priznanja i pohvale za takmičenja i/ili smotre u organizaciji Ministarstva potpisuje ministar, a za ostala takmičenja i/ili smotre ovlašteno lice organizatora.

#### **Član 11.**

##### **(Finansiranje takmičenja i smotri)**

- (1) Ministarstvo obezbjeđuje radne i testovne zadatke za općinska takmičenja i snosi troškove njihove izrade i garantuje njihovu tajnost.
- (2) Organizator snosi materijalne troškove pripreme i realizacije takmičenja i/ili smotre u skladu sa članom 12. ovog pravilnika.
- (3) Sredstva za finansiranje takmičenja i smotri na nivou Kantona, kao i sufinansiranje učešća učesnika/predstavnika Kantona na višim nivoima takmičenja, planiraju se u budžetu Ministarstva na osnovu projekta iz člana 6. ovog pravilnika za svako takmičenje ili smotru pojedinačno.
- (4) Ministarstvo, kao suorganizator, snosi dijelove troškova definisane zaključenim sporazumom sa organizatorima takmičenja i smotri.
- (5) Za učesnike koji se plasiraju na više nivoe takmičenja ili smotri, Ministarstvo snosi troškove ili dio troškova za učestvovanje u skladu sa mogućnostima, odnosno planiranim sredstvima u budžetu.

#### **Član 12.**

##### **(Troškovi)**

- (1) Obavezni troškovi organizacije i realizacije takmičenja i smotri su:
  - a) eventualni zakupi prostora,
  - b) ishrana za učesnike,
  - c) potrošni materijal,
  - d) finansijska naknada za rad u komisiji,
  - e) eventualne zdravstvene usluge,
  - f) eventualne sigurnosne usluge i
  - g) diplome/priznanja/zahvalnice.
- (2) Ostali troškovi organizatora u skladu sa mogućnostima su:
  - a) novčane nagrade,
  - b) pokloni i
  - c) prevoz učesnika.

#### **Član 13.**

##### **(Praćenje i izvještavanje o održanim takmičenjima i smotrama)**

- (1) O održanom takmičenju i/ili smotri, organizator podnosi pisani Izvještaj Ministarstvu i Pedagoškom zavodu, ukoliko Pedagoški zavod nije organizator, a koji obavezno sadrži:
  - a) naziv takmičenja i/ili smotre i organizatora,
  - b) mjesto i vrijeme održavanja,
  - c) broj učesnika,
  - d) izvještaj komisije,
  - e) broj nagrađenih učenika (rang listu/tabelarni prikaz - ime i prezime učenika, razred, naziv škole i općinu u kojoj se nalazi),
  - f) učenike koji su se plasirali na takmičenje višeg nivoa i
  - g) analizu takmičenja i/ili smotre (prednosti, slabosti, te preporuke za poboljšanje).

(2) Izvještaj iz stava (1) ovog člana se dostavlja školama čiji su učenici uzeli učešće u takmičenju i organizatoru višeg nivoa takmičenja na koje su se učenici plasirali.

**Član 14.**  
**(Završne odredbe)**

Ovaj pravilnik stupa na snagu 8 dana nakon objavljivanja u Službenim novinama Kantona Sarajevo, a primjenjivat će se od školske 2018/2019.godine.

Broj: .....  
Sarajevo, .....

MINISTAR:

.....